

MUSIKA. Philippe Alborren musikaz eta Arantxa Hirigoiennen hitzez

Haurrock: euskaraz kanta, dantza, entzun eta ikas

Plazan da Gazte Leiho maketa lehiaketa irabazi zutenen diskoa



BOB EDME

Haurrock taldeko kide batzuk, beren lanaren aurkezpenean.

Hur Gorostiaga | BAIONA

Haurrock talde lapurtarra 14 haurrek osatzen dute. Irailean diskoa argitaratuko duen Luther talde eibartarrarekin batera, Gure Irratiak antolatu Gazte Leiho maketa lehiaketaren talde irabazlea da. Lehiaketa irabazi eta udaberrian kantu berriak prestatzen jardun dute Philippe Albor musikagileak eta Arantxa Hirigoiennen hitzen egileak. Ekainean estudioetan sartu, eta lan atsegin eta jostagarria plazaratu du Agorila etxeak, *Bertsoa Dantzan* izeneko.

Orotara, hamalau euskarazko kantu biltzen ditu diskoak, baita bertso musikalak ere, entzuleek hitzez lagundurik kantatzeko enbeia ukan dezaten.

Philippe Alborrek azaldu zuenez, estilo ezberdinetako kantuak landu dituzte. «Hastapen batean haurrei zuzendurik eta eskoletan irakatsia izateko gisan. Baina guraso eta publiko guztiarendako ere gustagarri izanen dela uste dugu», azaldu zuen diska aurkeztean.

Kattalin gorri, *Gure Rockan sar*, *Etxea eraiki*, *Ttirri ttarra*, *Zazpi Su pizteko*, *Eztiki gordezka* jokoa, dantza edo ikasketa uztartzen dituzten kantuak dira, eskoletarako aproposak. Gaineratekoak, berriak, haurrendako kantuak, bai eta publiko zabalerako kantuak ere dira, erraz ikasi eta beharala xistuka-

tzen direnetakoak, musika eta hitz landuez, arrunckerian erori gabe.

Gisa berean, «haurrengan euskaraz kantatzeko gogoia eta horren bidez euskara ikasteko irrika piztea helburu» izan dutela adierazi zuen Arantxa Hirigoienek.

Bigarren diskan pentsatzen

Diskoaren prestaketa lanetan eta grabazioan hainbat musikaririk eman dute laguntza: Celine Mounolek gaitan, Xabi Peryk gitarra elektrikoan, Philippe Wyssek klarineta zein nahas-

ketetan eta Mathias Lopezek kontrabaxuan.

Manex Meyzenc Agorila disketxeko arduradunak jadanik «bigarren diskoan pentsatzen» ari direla azpimarratu zuen, Haurrock taldeak «etorkizun luzea» izanen duela iragarri.

8 eta 16 urte bitarteko haur eta gazteak dira: Marie eta Camille Dizabo, Argitxu Errotabehere, Pauline eta Anna Garai, Aurore Guerin, Maialen Negelua, Aurelie eta Elodie Lavielle, François Mialocq, Aude eta Baptiste Narzabal, Joana Harriaga eta Pantxoa Ithurbide.

LABURREAN

MUSIKA

Baionako Jazzaldiak aurtan izan duen mailarekin eta harrerarekin pozik agertu dira antolatzaileak

«Cole, Jamal, Peterson edo Kent jazzlariek kontzertu zoragarriak eskaini zituzten eta publikoa lakatu zen», agertu du Dominique Burukoak, Baionako Jazzaldiko lehendakariak, aurtengo ekitaldiaren bilana egitean. «Aldiz, arazoak ukan genituen aro txarrarengatik. Izan ere, aurtengo berrikuntza zen oihaltzerik ez erabiltzea Harresietako agerraldientzat eta euriarengatik behartuak izan ginen kontzertu batzuk Lauga gelan eskaintzera». Beraz, aurtan jende gutxi etorri da gaueko emanaldietara. «Hala ere, karriketan doan eskainiak ziren kontzertuak jendetsuak ziren eta horrek pozten gaitu, jazza ezagutarazi diegulako musika doinu hori entzuten ez duten frankori», erran zuen bestalde.

ZINEMA

Euskal Herrian egindako filmez osatutako zikloa eratu dute Txilen

Uztailaren 31tik abuztuaren 8a bitartean, Euskal Herrian egindako hainbat film ikusteko aukera izango da Txileko Unibertsitate Katolikoan: *El mayorazgo de Basqueretxe*, *Au pays des basques*, *La fuga de Segovia*, *La muerte de Mikel*, *Secretos del corazón*, *Maité*, *Yoyes* eta *Karamar Uhartea*. Euskadiko Filmategiarekin elkarlanean eratu du zikloa Txileko Unibertsitate Katolikoak, eta Filmategiko lehendakari Martin Ibarbiak hitzaldi bat emango du.

ARKEOLOGIA

XV edo XVI. mendean kanpaiak egiteko erabilitako labe bat aurkitu dute Azpeitian

Azpeitiko eliza nagusiko kapera txikiaren ondoan, XV edo XVI. mendean kanpaiak egiteko erabilitako labe bat aurkitu dute Aranzadi Zientzia Elkarteko hainbat kidek, leku hartan lanean ari zirela. Garai hartako hainbat nekropoli aurkitu izan dira Azpeititik gertu. Zarautzen zein Tolosan, baina Azpeitian aurkitu berri duten labearen pareko bakarra dago Euskal Herri osoan; hura ere Azpeititik oso gertu agertu zen, Azkoitian.

LITERATURA

Rosalía de Castroren omenezko lore eskaintza egin zuten, atzo, 30 erakundetik gorako ordezkariak

Galiziako Egunaren ospakizunen barruan, Galiziako 30 erakunde baino gehiagoko ordezkariak, fundazio, kultur zentro eta elkartetakoek lore eskaintza egin zuten atzo Rosalía de Castro galiziar poetaren hilobian, San Domingos de Bonavalen Galiziar Ospetsuen Panteoian. Manuel Fraga Galiziako Xuntako lehendakaria eta erakunde bereko beste ordezkari batzuk ez ezik, Galiziako unibertsitatekoak, Castela Alberto Brañas eta Rosalía de Castro fundazioetakoak eta Buenos Airesko Galiziar Zentroko ordezkariak ere izan ziren ekitaldian.

Guia
PEDAGOGI
IKASTEGIA

- ☐ Diagnostikoa eta orientazioa
- ☐ Maila guztietarako (lehen hezkuntza, bigarren hezkuntza, unibertsitatea...)
- ☐ Euskaraz nahiz gaztelaniaz
- ☐ Talde mugatuak

☎ 948 257156

Gartzia Naiarakoaren
pasealekua 4-1.a H
31008 IRUÑEA

Helbide elektronikoa:
guia-ikastegia@ctv.es

KM
kulturunea

Concha Jerez
Lekutik ezlekura - Del lugar al no-lugar

ERAKUSKETA
Koldo Mitxelena Kulturunea.
Erakustaretoa
Urdaneta 9, Donostia - San Sebastián.
2001eko uztailak 5- irailak 1

BISITA GIDATUAK:
Denontzat irekiak,
asteazkenero 19:30etan.

Gipuzkoako Foru Aldundia
Diputación Foral de Gipuzkoa